

Latit.
Gr. Scr.

Longit.
Gr. Scr.

48

INDEX GEOGRAPHICUS.

G.

32. 2. 66. 30.

Gaas Mons, videtur pars Montis Ephraim. V. Ephraim M. 2. Reg. 23. v. 30. inter fortes Davidis est Heddai de Torrente Gaas. Est ergo & Mons, & Torrens Gaas.

32. 51. 66. 48.

Gaba. Josephus lib. 3. Bell. 2. Mons Carmelus, cui conjuncta est Gaba, Civitas equitum, quæ sic appellatur, eo quod equites ab Herode Rege dimissi, coloni eo deducebantur. Dixerat ante lib. 2. c. 19. de Judæis tumultuantibus; Irruerunt (inquit) in Gadaram... etiam in Ptolemaidem, Gabam quoque, Cæsareamque tendebant. Et in vita sua Besaram ponit pene fines Ptolemaidis, & 20. stadiis à Gaba; ea ratione Gaba erit penes Carmelum M. & prope fines Ptolemaidis, & quâ à Ptolemaide Cæsaream iter est. Gabala videtur Ptolemæi, & Gamala Joseph. 13. Antiq. 21. & quæ Gaba ipsimet 15. Antiq. 10.

31. 50. 66. 48.

Gabaa, Gabae, duodecima, & ultima urbs primæ partis Tribus Benjamin, Jos. 18. v. 24. Levitis postea assignata est, Jos. 21. v. 17. ubi Gabae scribitur, & 1. Paral. 6. v. 60. ubi Gabee. Gabaa autem ubique lib. Judic. in historia uxoris Levitæ ab Gabaanitis in libidine extinctæ: quapropter cæteræ omnes Tribus Israël, Tribum Benjamin pene totam deleverunt. In Gabaa erat Domus Aminadab, ad quam reducta est Arca Domini, & filius ejus Eleazar sanctificatus est, ut illam custodiret, 1. Reg. 7. v. 1. Erat & domus Saül in Gabaa, & 14. v. 2. Saül morabatur in extrema parte Gabaa, sub Malo granato, quæ erat in Magron. 2. Reg. 5. v. 25. David percussit Philisthiim de Gabaa usque dum venias Gezer, & 3. Reg. 15. v. 22. Gabaa ab Asa Rege Judæ extruitur ex lapidibus & lignis, quæ Baasa Rex Israël attulerat ad Ramam muniendam. Geba apud Esdram, 2. c. 11. v. 31. & c. 12. v. 29. Cum hac Gabaa faciliè convenit.

31. 30. 66. 38.

Gabaa alia est in Tribu Juda, & quæ inter Accaim, & Thamna describitur in octava hujus Tribus parte, ubi urbes decem, Jos. 15. v. 57.

31. 42. 66. 42.

Gabaath vigesima quinta & penultima describitur inter urbes omnes Tribus Benjamin, Jos. 18. v. 28. & 24. v. 33. Eleazar filius Aaron mortuus est, & sepelierunt eum in Gabaath Phinees filii ejus, quæ data est ei in Monte Ephraim. Inter fortes Regis David est Ithai filius Ribai de Gabaath filiorum Benjamin, 2. Reg. 23. v. 29. Et iterum 1. Paralip. 11. v. 31. Ethai (qui ante Ithai) filius Ribai de Gabaath filiorum Benjamin. Apud Isaiam autem 10. v. 29. Gaba sedes nostra.... & statim Gabaath Saülis. Sed Gaba cum Gabaa Saülis meliùs convenit, ut in libris Regum, quam Gabaath, in qua nullum fuit Saülis domicilium.

31. 52. 66. 34.

Gabaon. Cum Gabaonitis censebantur olim Gabaon, & Caphira, & Beroth, & Cariath-jarim, Jos. 9. v. 17. & c. 10. v. 2. Urbs magna erat Gabaon, & una civitatum regalium, major oppido Hai, omnesque bellatores ejus fortissimi. Eam cum expugnare vellent Reges Jerusalem, & Hebron, & Jerimoth, & Lachis, & Eglon; qui sunt quinque Reges Amoræorum, quod Gabaonitæ sese dedissent Israëlitis, Josue castra movit è Galgalis: repenteque in hostes irruens, multos interfecit: plures Dominus grandine & lapidibus è cælo demissis... tum & Sol, & Luna steterunt, dum Israëlita de inimicis suis sese ulciscuntur. Gabaon prima describitur in secunda parte Tribus Benjamin, Josue 18. v. 25. & 12. v. 17. Levitis prima datur è Tribu Benjamin, quæ desideratur, 1. Paralip. c. 6. v. 60. Vide Animadv.

32. 35. 67. 18.

Gabara urbs à Jotapata 40. stadiis, Joseph. in vita sua.

33. 8. 67. 8.

Gabaragana.

32. 25. 66. 42. $\frac{1}{2}$

Gaber. V. Gaver.

Gad.